

Wasika-à Bulus Ba Ya Sig TIMOTI Wà Wa Zyun

Sai-à Timoti zìg Yesu Kristi á pìkyinnwá ni, n kà mi ri dang kyann jir Shìdun ku ma Bulus níng, sai-à níng hi ku í wùnshái, ku í wùn sukà. A wasika-à níng ni Bulus dinya sig Timoti rag, kada aku zìm wà mpìrká ri tàg jir òsáng níng abig tàg mpìrká bir sig pìkyinn á byar Yesu ni níng, bàna. Ku dinya Timoti rag, àgbamká áyau mpìrká ri bàg Yesu abig shi shu kyìkyàr. Ku dinya wàníng barà wàníng má shi mpìr asa swàm Yesu òsàn níma áni.

¹ I mì Bulus, mì ri ba yá wù nì. Shìdun zyun-à ri zìg zu yi á bu pyìr níng, ku í àsàin-à bar sig mì rag í shi wùn aswam Yesu Kristi zyun-à yi bir sig pìkyinnyí á dèrwá ni níng.

² A byar Timoti, wà zyun-à í wùnmí á jir pìkyinn bir á byar Yesu.

Tayí Shìdun ma Shinn Luyí Yesu Kristi abig wìr kà ya wù àsàn, abig myàng ashiwú, abig ya wù pìkyinn na tag.

Bulus Twìb Byur á Shinn Mpìrká Ri Tàg Jir Nsáng

³ Sai-à ò fim wù mì ri yag mà Makidoniya ò vig wù n dang rag á shi á Afisa, jirà á kan òm mpìrká ri tàg jir òsáng.

⁴ A kan òm big bu òsáng-à big ri tàg níng, ma bu tàg-à big ri tàg áshinn bu yàkúká rì. Buká big

ri tàg níng ri gbar bi yipyàr, ri tàg fig mpìrká barà bá sa bu-à Shìdun ri zìm níng bàna, bu-à Shìdun ri zìm níng hi wà mpìr ma bir hing pìkyinn á byar Yesu í wà kwá yì.

⁵ Bu-à mì ri zìm bàna, mì ri zìm mpìrká bu Kristi abig shi mpìrká ri zìm mpìr ma pìkyinn nzyun, ma abig shi ma pìkyinn kyìkyàr, ma abig bir pìkyinn á dir Kristi ngbam nímá.

⁶ Mpìrká káhi fim rìghing gbìb-à níng n bàg rìghing gbìb ajànn, mi ri dang jírká zyun-à bàna ma yìr.

⁷ Big ri zìm abig tàg doka Shìdun, ama big yì fig bu-à big ri dang bàna. Big sinn sig á pìkyinnbá ni rag big yì hing bu-à big ri tàg, ama big yì fig bàna.

⁸ Yi yì hing rag doka Shìdun sànn hing, wà mpìr ma sa hing swàm ma kàhi àràg barà Shìdun ri zìm.

⁹ Yi yì hing rag Shìdun sinn fíg doka á dò jir shinn mpìr sisàn bàna. Ku sinn síg á dò jir shinn mpìrká ri wib fig jír bàna, mpìrká ri sa yawari, mpìrká ri bàg fig Shìdun bàna, mpìrká ri sa bu pyìr, mpìrká ri shi fig shu kyìkyàr bàna, mpìrká ri wib fig Shìdun bàna, mpìrká ri gban nàbá ma tabá, mpìr agban kíká,

¹⁰ ma mpìrká ri sa àyái, ma mpìrká ri na ma jàubá wunù, ma mpìrká ri jwi mpìr jíkwinn, ma mpìrká ri gim òsàng, ma mpìrká ri kà nu mpìr agim òsàng, ma mpìrká ri sa bu-à shi fig ábibir àràg bu jír àjai-à níng bàna.

¹¹ Jír àjai-à níng shi sig ábibir àràg tai àjwár zyun-à Shìdun ùwài ya kà sig á vùmí ni rag n dinya mpìrká.

Bulus Ri Sa Shìdun Isoko

¹² Mì ri sa Yesu Kristi Shinn Luyí ísoko, ku zyun-à ya sig mì gbam, n myàng mì rag n kinn hing wà í sa swàmwá, n sinn kà sig mì rag í sa swàmwá,

¹³ kó barà sai-à rì níng n dang hing jír-à bibai á shinnwá ni, n ya hing mpìrká buwá shwìn, n sa bai hing zìnnwá. Ama bidìm pár, Shìdun myàng ashimí, jir kai bàna n yì fig bu-à mì ri sa bàna, n bir fig ma pìkyinn á byarwá ni bàna.

¹⁴ Shinn Luyí Yesu Kristi sa ya mì àsàn ùwài nímá, n tàg mì barà í bir pìkyinn á byarwá ni, ma í zìm ku ma pìkyinn ízyun.

¹⁵ Jír-à ma dang níng í jir àjai, sànn sig kó ni aku pànn wù pyànà, jír-à hi í wàníng: Yesu Kristi bi sig á jànn-à ni àjirà aku zìg zu kó ni á bu pyìr, bu pyìrmí kab síg nì bu kó ni bidìm pár.

¹⁶ Bu-à sa Shìdun myàng sig ashimí níng, í jirà Yesu Kristi aku tìya mpìrká rag ku ri sa muyar ma mì, mì zyun-à bu pyìrmí kab bu kó ni níng, jirà aku tìya mpìrká zyun-à má bir pìkyinn á byarwá ni níng rag kwá yafa ya big bu pyìrbá tìnn, bá dìg yonki kinn kinn.

¹⁷ Kùr zyun-à má shi hár kinn kinn, kwá wu fig bàna, mpìrká ri myàng fig ku á zu bàna níng, ku í Shìdun, aku shi bu-à mpìrká má wib ku hár kinn kinn, má swam yan zìnnwá. Aku shi àdòníng.

¹⁸ Timoti wù wùn mí, buká mì ri zìm í dinya wù níng í wàníng: Mì ri vig wù á shi àzír, á sa swàm Shìdun àràg í soja ri nu kànn, í barà mpìrká ri dang kyann jir Shìdun rì dang sig á shinnwú ni rag wá sa.

¹⁹ A shi bir kyann pìkyinn á byar Yesu. A shi ma pìkyinn-à kyìkyàr. Mpìrká bàna ma pìkyinn-à kyìkyàr níng, big fim rìghing pìkyinn birbá á byar Yesu Kristi.

²⁰ Ayaubá ni í Himanayas ma Alizanda, í ká ò ya kà sig á vù Shaitan aku du kà big á shwìn jirà abig kyab jír, jirà kada abig sa bai zìnn Shìdun bàna.

2

Bu-à Ná Sa Bàna, Aning Vig Shìdun

¹ Bu-à mì ri zìm aning sa bàna í wàníng: Aning vig Shìdun á shinn mpìrká bidìm pàr, ma aning vig ku aku myàng ashi mpìrká, aning sa ya ku ísoko á shinn bu-à ku ri sa ya mpìrká.

² Aning vig Shìdun á shinn kùrká ni ma mpìr àgbamká bidìm pàr, àjirà ayi shi shu àjwár, pìkyinnyí aku na tag ma ayi bàg Shìdun big kyinn ízyun.

³ Wàníng í bu-à sísàn, í bu-à Shìdun zyun-à má zìg zu yì á bu-à bibai níng ri zìm.

⁴ Shìdun ri zìm a kó ni wìm zu, ma a kó ni yì gbìb sísàn.

⁵ Shìdun í ku kwá awínwá ni. Mpìr zyun shi sig áni, ku í mpìr-à ri gbar jùn kwonn Shìdun ma mpìr, ku í Yesu Kristi.

⁶ Yesu wann tafinn sig shinnwá àjirà aku wa zu mpìrká ri sa bu-à bibai á jànn-à ni bidìm pàr. Shìdun ri zìm mpìrká abig dìg yonki. I bu-à sa ku swam bi sig Yesu á su-à ku ri zìm.

⁷ Wàníng í bu-à sa Shìdun swam bi sig mì, ñ dinya mpìrká jir àjwár, ku shig zu sig mì ñ shi

wùn aswamwá. Bu káníng bidìm pá r m̀ ri dinya ning í jír àjai. M̀ ri gim fíg òsáng bàna. Ku shig zu sig m̀ jirà ò t̀g mpìrká zyùn-à í Yahudawaká bàna níng, abig bir p̀kyinn á jír zyùn-à í àjai.

⁸ M̀ ri zìm wunùkà kó àni bidìm pá r abig vig Shìdun, abig gbar dù nann vùbá mà wai, ma p̀kyinn-à kyìkyà r. Abig shi mpìrká ri nann àgùn b̀na, abig shi mpìrká ri sa yipyà r bàna.

⁹ M̀ ri zìm uwàkà abig zir jà barà s̀n sig abig zir, abig zir jà á gbìb-à má t̀g rag big í mpìr wib. Kada abig s̀nn p̀kyinnbá íri jinn bìr bàna, kó bu-à ri ngìg kpàin kpàin àr̀g zinariya, kó bu zyùn àr̀g bukà big ri pag á wàin, kó íri wà áshinn jà bàì bàna,

¹⁰ ama abig shi mpìr kyinn s̀s̀n, àr̀g barà s̀n sig uwàkà ri wib Shìdun abig shi.

¹¹ Uwà aku shwann bu, aku p̀nn shi akim, aku shi gang sung aku fig jír ma aku wib.

¹² N zìm fig uwàkà abig t̀g bu ma abig shi shinn wunùkà bàna, abig p̀nn shi akim,

¹³ jir kai bàna big mà m̀ jag sig Adamu, í wà big mà m̀ sig Hawa.

¹⁴ Big tonn kà fíg Adamu bàna, ama big tonn kà síg uwà hár ku sa bu pyìr.

¹⁵ Ama uwà má d̀g yonki á jir shinn wùn mà, bá d̀g yonki wà ba shi ma ri bir p̀kyinnbá, ma zìm hing mpìr, ma shi hing shu kyìkyà r, ma p̀nn shinnbá.

3

Mpìr Agbam Iklisiyaká Abig Shi Mpìr-à Ns̀n

¹ Jír-à níng í jír àjai, wà big dang sig n rag: Mpìr-à ma ri mam á kyinnwá ni rag kwá shi àgbam iklisiya, ku ri mam bu-à òsàn.

² Sàns sig mpìr-à ma shi àgbam iklisiya aku shi mpìr-à ri sa fig bu-à bibai bàna, aku shi ma uwà òzyun, aku shi mpìr-à ri pànn shinnwá, aku shi àzír, aku shi mpìr-à mpìrká ri yan kyinnwá, aku shi mpìr-à ri pànn kyinn vù pyàná á luwá ni, aku shi mpìr-à má tàg yì mpìrká bu,

³ aku shi mpìr awa pyann shin bàna, aku shi mpìr-à má swau pyann shí bàna, ama aku shi mpìr kyinn ajun, aku bai òr ma mpìr bàna, aku shi mpìr azim bàì bàna.

⁴ Aku yì barà kwá bàg ma mpìrká á luwá ni sísàn níma, ma aku tàg yar yanká buwá big, jirà abig wib ku.

⁵ Mpìr-à ma pànn yì fig luwá bàna, sáshinn kwá pànn yì bir mpìr iklisiya rà?

⁶ Mpìr-à hi kada aku shi mpìr-à kà sig ma àpyú á gbìb Yesu ni bàna, jirà aku gbar dù shinn bàna, ma aku kù kà á kwonn wà-à bá wà Shaitan níng bàna.

⁷ Aku shi mpìr-à òsàn, jirà mpìrká zyun-à ri bàg fig Yesu bàna níng, abig yan ku tinn, jirà kada abig bar bai zinnwá bàna, ma aku kàng bu-à bá tor pànn ku jirà aku kà á vù Shaitan bàna.

Jír-à Bulus Ba Sig á Shinn Dikonká

⁸ Dikonká abig shi mpìrká shi sig ma pìkyinn-à sísàn, abig shi mpìr gwangga. Kada abig shi mpìr awa pyann shin bàna, kada abig shi mpìr sunu bàna.

⁹ Abig bir pìkyinnbá á jírká Shìdun tiya byann sig big á shinn barà bá bàg Yesu, ma abig shi mpìr kyinn kyìkyàr.

¹⁰ Abig màg màg fig ma big mpyim. Wà ba myàng kyinnbá ma sànn hing, í wà abig ya big swàm-à hi abig sa.

¹¹ Uwàká bigbá abig shi ma pìkyinn-à sèsàn tinn. Kada abig zinn swau mpìr bàna, ama abig pànn shinn, ma abig shi mpìr gwangga.

¹² Dikonká abig shi ma uwà nzyun ma abig shi mpìr-à ma pànn samyib yanká bubá ma mpìrká á lubá ni.

¹³ Mpìrká ma ri sa swàm-à sèsàn, bá dìg zìnn-à sèsàn á pyànn mpìrká ni. Bá dang jír ma gbam á shinn pìkyinn birbá á byar Yesu Kristi.

Jír Zùzwàun á Shinn Yesu Kristi

¹⁴ Mì ri kyab á kyinnmí ni, má bi myàng wù má nonn fig ánonn bàna.

¹⁵ Mì ri ba ya wù wàníng, jirà kó ma yag fòr fonn fig bàna, wá yì bu-à Shìdun ri zìm mpìrká á luwá ni abig sa, wato í bìr mpìrká á iklisiya bu Shìdun, àsàin-à shi sig ma yonki. Mpìr iklisiyaká í mpìr gwangga. I mpìrká ri tàg jir Shìdun á gbìb àjài.

¹⁶ Buká Shìdun sa ya sig yi bidim pár, yi yì gban fig bàna, zwàun hing wàni, buká hi í wàníng: Yesu bi á jànn-à ni n nga wi dir mpìr jíkwinn. Awun kyìkyàr tiya hing yi rag ku í mpìr gwangga. Yann aswam Shìdun mà wai myàng hing ku. Jir àjwár á shinnwá ni big dinya rìghing mpìrká á jànn-à ni.

Hár mpìrká bir hing pìkyinn á byarwá ni.

I wà big zìg yag rìg ku mà wai.

4

Jír á Shinn Malamká Ri Gim Nsáng

¹ Awun Kyìkyàr dinya kyàr hing yi n rag àyúnn-à dunyaru ma nyàan vinn mpìrká má fim rìg wà bá wib Shìdun, bá wib sòr wàuká zyun-à ri gim ya big òsáng, bá bàg bu-à wàuká ri tàg.

² Swai bu tàg káníng ri bí mà byar mpìrká ri gim òsáng, mi ri tonn gban mpìrká. Kyinnbá wu rìghing àràng big twìb wu síg ma akan pyìr.

³ Mpìr káníng ri tàg mpìrká rag sànn fig wà mpìr aku sìn ban bàna. Big ri tàg mpìrká rag bujúká káhi shi sig áni, kada mpìr aku ji bàna. Ama Shìdun mànn sig buju abig ji. Mpìrká ri bir pìkyinn á jir Shìdun, n yì hing gbìb àjai níng, wà ba sa hing Shìdun ísoko, bá ji buju-à hi.

⁴ Bujuká Shìdun mànn sig bidim párr, sànn hing. Mpìr aku ngàng bàna. Mpìr aku zìg ma vù pyànà, aku swam yan Shìdun,

⁵ jir kai bàna jir Shìdun, ma Shìdun vig ri sìn kàng bu aku shi òsàn á pyànn Shìdun.

Fàu Sìsàn Bu Yesu Kristi

⁶ Wà wa kyab pànn ya hing jàuyí big buká ò dinya sig wù níng, wá shi í fàu sìsàn bu Yesu Kristi, wá bir pìkyinnwú ngbam níma á bu àjai-à big tàg sig wù, wù ri bàg níng.

⁷ Kada á bàg jir òsàng-à big ri tàg níng bàna. Ama á tàg shinnwú barà wá wib Shìdun.

⁸ Mpìr-à ma sa swàm ma òrwa, òrwa má gbm wàni. Wà àdòníng, sànn hing. Ama mpìr-à

ma bàg Shìdun, sà̀n kab síg nì, jir kai bàna gbìb-
à níng hi ri ya mpìr yonki-à wà tàma-à níng ma
wà á pyànn.

⁹ Buká n̄ dang sig níng í àjai, í jir bu jau bàna,
kó ni aku bir pìkyinn aku zìm.

¹⁰ Bu-à sa yì ri kar ngang, mi ri sa swàm wàni
níng, í jirà yì bir sig pìkyinn á byar Shìdun àsàin-
à shi sig ma yonki, ku zyun-à ku zìg zu mpìrká á
jànn-à ni bidim pá̀r, àràg mpìrká bir sig pìkyinn
á byarwá ni níng bàna má.

¹¹ Buká n̄ tàg sig wù níng, á tàg mpìrká
àdòning tinn.

¹² Kada á zìm mpìr zyun aku myàng rag à fòr
fig bu zyun bàna, jirà wù í wùnshái níng. A shi
shu-à mpìrká ri bàg Yesu má myàng, má shi àràg
wù. Jír-à wá dang aku shi jír-à shi sig ma gbìb. A
shi shu pìkyinn ajun, á zìm mpìr, á bir pìkyinn,
ma á shi shu kyìkyà̀r.

¹³ A shi jangga kyann ya mpìrká jir Shìdun, á
dinya big jír-wá, jirà abig fig. A gbar gbam big ò̀r,
ma á tàg big. A shi sa bu káníng hár àyúnn-à má
bi.

¹⁴ Sai-à àgbamká tib wann wù vù á shinn-à ni,
á sai-à mpìrká ri dang kyann jir Shìdun dang jír
á shinnwú ni níng, Shìdun ya sig wù yar. Kada
á ngàng yar-à hi bàna. A sa swàm Shìdun ma
kàhi.

¹⁵ A shi sa àdòning ma á bir pìkyinnwú jirà
á sa bu káníng hi, jirà mpìrká abig myàng rag
swàmwú ri yag mà pyànn.

¹⁶ A pànn shinnwú, ma á yì buká wù ri tàg.
A sa kyann bu káníng, jir kai bàna wa sa hing
àdòning, wá zìg zu rìg shinnwú kwonn ma

mpìrká wù ri tàg níng tìnn.

5

Jír á Shinn Uwà Kiká Ma Agbamká Ma Fàuká

¹ Kada á yan ta shun àgbam bàna. Ama á dang jír ma ku ádàn àràng í tawú. A sinn kàng yann sukáká abig shi àràng í wunzàwú big.

² A sinn kàng uwà shun àgbamká àràng í nàwú big. A sinn kàng yann uwàká àràng í ajunwàwú big. A shi shu kyìkyàr ma big.

³ A wib uwàká nùbá wu rìghing níng, ká bàna ma mpìrká má myàng kwonn ma big níng.

⁴ Uwà ki-à ma shi sig ma yann kó yann ada, sàns sig yanká hi abig myàng kwonn ma ku, àràng barà jir Shìdun tàg sig. Abig myàng kwonn ma mpìrká á lubá ni, ma abig sa shang tabá ma nàbá tìnn. Wà ba sa hing àdòníng, má shi àràng big ri wa pyann kàng bu-à káníng rì sa ya sig big níng. Wàníng í bu-à Shìdun ri fig àjwár ma kàhi.

⁵ Wà uwà ki ma shi sig áwinwá ni, kwa dìg fig mpìr-à má myàng kwonn ma ku bàna, ku ri zìm a Shìdun myàng kwonn ma ku. Kwá vig Shìdun fi big àyúnn a wàníng myàng kwonn ma ku.

⁶ Ama uwà ki-à ma ri kyab íri àjwár bu dunyaru, shi àràng ku wu rìghing, kó barà ku shi sig ma yonki níng.

⁷ A dinya mpìrká ri wib jir Shìdun abig sa bu káníng, jirà kada mpìrká abig dang bai big bàna.

⁸ Mpìr-à ma myàng kwonn fig ma yiwaiwá big bàna, àràng ká á luwá ni bàna má, to mpìr-à níng shi sig àràng mpìr-à ngàng sig jir Shìdun, n bir

fig rag pìkyinn áni bàna. Shuwá bai kab hing bu mpìrká zyun-à ri bàg fig Yesu bàna níng.

⁹ Ayau tarkada zìnn uwà kíká, zyun-à iklisiya má myàng kwonn ma big níng, kada abig ba kà zìnn uwà zyun átai bàna, sái kwa fòr hing ji dib-sara, wà ku rì ma zìg sig wunù nzyun,

¹⁰ n rì ma sa hing bu-à òsàn, ma pyag samyib hing yanká buwá, wà ku rì ma ri pànn kyìnnká vù pyànà á luwá ni, n ma sinn wann hing shinnwá á jinn ni, ma sa ya hing mpìrká bu Shìdun swàm ma sa shang hing mpìrká shi sig áyau shwìn, ma sa hing swàm òsàn kó wà áni bidim pár, í wà abig ba kà zìnnwá.

¹¹ Ama kada aning sìnn kà zìnn uwà kíká zyun-à í yann wùnshái níng bàna, jir kai bàna wà ba wim á kyinnbá ni rag bá sir ban, bá fim rìg nu-à big gib ya sig Kristi níng.

¹² Wà ba sa hing àdòning, big ri gbar bi yá shinnbá kwonn wà bu Shìdun, jir kai bàna big bàg fig nu-à big gib ya sig Shìdun níng bàna.

¹³ Yann uwà ki káníng ri sa fig bu zyun bàna. Big ri kà kyann á lu mpìrká ni, mi ri zìnn swau mpìrká. Jír-à ma zu fíg big bàna, big ri kà áyau-à ni. Big ri dang jír ká sànn fig wà abig dang bàna.

¹⁴ I bu-à sa ò zim kab sig wà yann uwà ki káníng abig zìg wunù, ma abig mà wùn, ma abig pànn samyib lubá. Wà ba sa hing àdòning, mpìr azíbyí big, má dìg fig pyù-à bá dang jír-à bibai á shinnyí ni bàna.

¹⁵ Uwà ki káníng káhi vim bìr rìghing pìkyinnbá, tàma-à níng big ri bàg rag í Shaitan.

¹⁶ Wà mpìr zyun-à ma ri bàg Kristi ma shi sig

ma uwà kíká á luwá ni, aku ya káníng bu-à big ri zìm, kada aku fim kà ya íri iklisiya bàna, jirà a iklisiya myàng kwonn ma uwà kíká zyun-à bàna ma mpìrká ma myàng kwonn ma big.

¹⁷ Agbamká ma ri sa swàm Shìdun sèsàn nímá, sànsig abig wa big bàililib nímá, àràg mpìrká ma ri tàg jir Shìdun, ma ri dinya mpìrká jir àjwár níng bàna má,

¹⁸ jir kai bàna jir Shìdun dang rag, “Kada abig bir òm nu nai-à ma ri sa swàm bàna.” Jir Shìdun dang jakàng n rag, “Mpìr-à ma ri sa swàm, sànsing abig wa ku anìwá.”

¹⁹ Kada á zìm wà abig zìg bi kwonn wà á shinn àgbam iklisiya zyun á byarwú ni bàna, sáim pìr pyànà kó sara ma zìg bìsìg jír-à hi ni.

²⁰ Mpìrká ma sa bu-à bibai, á yan ta big áyau bìr-à ni, jirà mpìrká dà níng abig shàr zinn.

²¹ N kwonn hing wù ma Shìdun ma Yesu Kristi, ma yann aswam Shìdun mà wai, á bàg buká ò dinya sig wù níng, ma pìkyinn òzyun, á wà kwonn kó kai ábibir.

²² Kada á síg kír kír wà wá tib wann mpìr zyun vù áshinn-à ni, jir swàm Shìdun sa bàna. Kada á sa bu pyir àràg barà mpìrká kádà ri sa níng bàna. A shi shu kyìkyàr.

²³ A wa íri zàpìr bàna, ama á wa zàn inabi títi nímá jirà buju aku na bàg á finnwú ni, jir kai bàna suká káhi wù ri fig fig àjwár finnwú bàna.

²⁴ Mpìrká káhi ri sa bu bibaibá á yiyar-à ni. Kó ni yì rìghing rag bá wà big kwonn. Ama mpìrká káhi bu-à bibaibá big ri bònn sísa. Ama má mìr gbìb zu àyúnn zyun.

²⁵ Wàníng má í barà shi sig áni, swàm-à ma í swàm òsàn, mpìrká má myàng yì rìg. Swàm òsànká zyun-à mpìrká ri myàng fig bàna níng, má mìr gbìb zu rìg àyúnn zyun.

6

¹ Mpìrká zyun-à má í fàu, abig wib àsàin lubá ma pìkyinn òzyun, jirà kada mpìrká abig dang bai zìnn Shìdun ma bu tàgyí bàna.

² Fàuká zyun-à ma shi sig ma àsàin lubá ká ri bàg Yesu, kada abig sa káníng yawari jirà káníng í wunzàbá á gbìb Yesu ni bàna. Bu-à bá sa bàna, abig wib àsàin lubá wàni, jir kai bàna àsàinká zyun-à má dìg bu áyau swàmbá big ri sa níng hi ni, í mpìrká ri bàg Yesu, ká zyun-à big ri zìm. Wàníng í buká mì rì zìm á dinya mpìrká ma á tàg big.

A Bàg Shìdun Ma Pìkyinn Nzyun

³ Mpìr-à ma tàg hing bu zyun kim, ma ngàng hing jír á shinn Shinn Luyí Yesu Kristi ni, wà zyun-à í jir àjai níng, ma zìm fig bu-à gbìbyí ri dang níng bàna,

⁴ Mpìr-à níng hi í mpìr agbar dù shinn, kwá yì fig bu zyun bàna. Ku ri zìm aku sa yipyàr á shinn buká zyun-à bàna ma yìr. Ku ri zìm shùr gbìb, zyun-à ri gbar bi akyib, ma ngain, ma wà tìr ya mpìr jir átai,

⁵ má wà gbar wab kwonn mpìrká abig sa yipyàr, mpìrká shi sig ma pìkyinn-à bibai, ká zyun-à bàna rag ma jir gwangga á pìkyinnbá ni, big ri kyab rag gbìb Shìdun bàg í gbìb swàm bàì.

⁶ Ama mpìr-à ma ri bàg Shìdun ma pìkyinn nzyun, kwá fig àjwár ma bu-à ku shi sig ma kàhi.

⁷ Yi zìg bi fig bu zyun á dunyaru bàna, yá zìg kàng yag fig bu zyun bàna tinn.

⁸ Wà ya shi sig ma buju ma jàkà yá wìr, wàníng màg hing yi.

⁹ Ama mpìrká ma ri zìm abig shi mpìr bàì, bá sa bu bibaìkà kim kim. Bá wìm bu-à bibai kim kim. Bu-à bibaìkà big ri wìm níng, má tonn kà big á gbìb ajànn, má sa bá kà á pyìr.

¹⁰ Bàì zìm í bu-à ri sìnn kà mpìrká abig sa bu-à bibai kim kim. A jir shinn bàì zìm, í bu-à sa mpìrká nìnnànn nímá fim rìghing gbìb Shìdun, big sìnn kà rìghing shinnbá á shwìn.

Buká Sànn Sig á Kyab Pànn

¹¹ Ama wù, Timoti, wù í mpìr Shìdun, á shàr bu bibai káníng. A shi á gbìb-à sìsànn. A wib Shìdun, ma á sa bu-à sìsànn ma á bir pìkyinnwú á byarwá ni, ma á zìm mpìr, ma á tib pìkyinnwú, ma á sa kó kai bidìm pàr ádàn-à.

¹² A kar ngang barà wá sar gbam á pìkyinn birwú ni. A pànn yonki zyun-à má vinn fig ávinn bàna. I dò jir yonki-à níng hi, í bu-à sa Shìdun bar sig wù, jir shinn pìkyinn birwú à bir sig, wà zyun-à mpìrká nìnnànn nímá yì hing.

¹³ N kwonn hing wù ma Shìdun zyun-à ri ya kó kai bidìm pàr yonki, n kwonn hing wù ma Yesu Kristi, zyun-à rì dang byann sig jír àjai á pyànn Buntus Bilatus,

¹⁴ á sa vinn rìg kó kai bu-à Shìdun dang sig rag á sa, hár àyúnn-à Shinn Luyí Yesu Kristi má kàng bi áni, jirà kó ni aku dang bai wù bàna.

15 Kwá kàng bi á sai-à Shìdun sìnn sig rag kwá kàng bi. Shìdun zyun-à í kùr kó ni bidim pár, Shìdun zyun-à mpìrká má swam yan ku, ku í Shinn Lu kó ni bidim pár.

16 Ku shi síg nì àsàin-à má wu fig ki bàna, ku shi sig áyau àyar zyun-à mpìrká má bi fòr sar fig màhàn bàna. Kó mpìr nzyun taba myàng fig ku bàna. Mpìr má myàng sar fig ku bàna. Mpìrká abig swam yan ku hár kinn kinn. Abig yì rag, ku í kùrbá wà ùwài. Aku shi àdòníng.

17 A dinya mpìrká shi sig ma bàì abig gbar dù shinn bàna, kada abig sìnn pìkyinnbá á bàibá ni bàna, zyun-à má shi nonn fig bàna níng. Ama abig bir pìkyinnbá á byar Shìdun zyun-à ri ya yi kó kai, jirà ayi fig àjwár.

18 A dinya big abig sa bu-à sèsàn ma bàibá, ma abig sa swàm sèsàn, ma abig ya vù.

19 Ba sa hing àdòníng, big ri sìnn ya shinnbá ashikáun mà wài, í bu shinn dìrbá hár kinn kinn. I wà bá dìg yonki zyun-à kinn kinn.

20 Wù Timoti, á pànn bu-à Shìdun ya sig wù àràg í amana níng, ma á zu rìg áyau mpìrká ri dang jír yipyàr ma jír zyun-à í jir gbìb Shìdun bàna. Big dang rag í jir yar, ama í jir-à bàna ma yìr.

21 Mpìrká káhi kyab rag big shi sig ma yar, í bu-à sa big fim rìghing wà bá bir pìkyinnbá á byar Shìdun.

Asàn Shìdun aku shi kwonn ma ning.

Jibu
Jibu: Jir Shidun (New Testament)

copyright © 2019 Wycliffe Bible Translators, Inc.

Language: Jibu

Contributor: The Nigeria Bible Translation Trust

All rights reserved.

2025-05-06

PDF generated using Haiola and XeLaTeX on 5 May 2025 from source files
dated 6 May 2025

a1139895-fa13-5ff1-8c00-a8ad25fcfa2f